

- केन्द्रीय मंत्रिमंडल प्रधानमंत्री किसान संपदा योजना सारू 6 हजार 520 करोड़ रुपया रा खर्च ने मंजूरी दीनी।
- प्रदेश रा ऊगणी हलकां मांय भारी बारिश ऊं जिन्दगी माथे घणो असर पड़्यो-धौलपुर मांय फौज री मदद ऊं राहत अर बचाव रा काम जारी।
- मुख्यमंत्री भजनलाल शर्मा कह्यो-राज्य सरकार जनता री आंख्यां रा बेहतर स्वास्थ्य सारू लगातार कोशिश कर रही है।
- बैंकिंग संशोधन कानून-2025 काल लागू व्हेला।

000

केन्द्रीय मंत्रिमंडल प्रधानमंत्री किसान संपदा योजना सारू 1 हजार 920 करोड़ रुपया रा और खर्चा सागे कुल 6 हजार 520 करोड़ रुपया रा खर्च ने मंजूरी दे दीनी है। मंत्री मण्डल री आज नई दिल्ली मांय व्ही मीटिंग पाछे सूचना अर प्रसारण मंत्री अश्विनी वैष्णव कह्यो के इण मांय 50 बहु-उत्पाद खाद्य इकाइयां लगावण मांय मदद सारू एक हजार करोड़ रुपया रो प्रावधान करी ज्यो है। ई रे अलावा इण मांय एनएबीएल ऊं मान्यता मिल्योड़ी एक सौ खाद्य परीक्षण प्रयोगशालावां खोलण माथे व्हेवण वाळो खर्च ई शामिल है।

.....

मंत्रिमंडल चार साल री मियाद सारू दो हजार करोड़ रुपया रा खर्च वाळी राष्ट्रीय सहकारी विकास निगम अनुदान सहायता-एनसीडीसी ने ई मंजूरी दे दीनी। एनसीडीसी चार साल मांय खुला बाजार ऊं 20 हजार करोड़ रुपया जुटा सकेला। आ रकम नुवी परियोजनावां सरू करण या कारखानां ने और बधावण सारू सहकारी समितियां ने कर्ज देवण सारू काम ली जावेला।

000

प्रदेश रा ऊगणी हलका मांय व्हे रही भारी बारिश रे कारण केई ठौड़ां जिन्दगी माथे घणो असर पड़्यो है। लारला 24 घंटां मांय प्रदेश री केई ठौड़ां हल्की ऊं मझला दर्जा री जद के कठे-कठे भारी ऊं घणी भारी बिरखा व्ही। जयपुर कने शाहपुरा मांय सब ऊं बत्तो 16 सेंटीमीटर पाणी बरस्यो। कोटपूतली, पावटा, विराटनगर अर जमवारामगढ़ समेत केई ठौड़ां ई जम र मेह बरस्यो। भीलवाड़ा जिला रा मांडलगढ़ मांय 12 सेमीमीटर, टोंक जिला रा पीपलू मांय 11 सेंटीमीटर अर चूरू जिला रा रतनगढ़ मांय दस-दस सेंटीमीटर बरसात व्ही। जयपुर शहर मांय आज ई हल्की ऊं मझला दर्जा री बिरखा व्ही। प्रदेश रा ऊगणी हलकां मांय लारला दो-तीन दिन मांय व्ही जोरदार बिरखा रे कारण चम्बल अर सहायक नदियां मांय पाणी उफण रह्यो है। करौली मांय चंबल नदी खतरा रा निशाण ने पार कर गयी है जद के धौलपुर मांय आ खतरा रा निशाण ऊं 13 मीटर ऊंची बह रही है। म्हाणा खबरनवीस बतायो के नीचला हलकां मांय पाणी भर जावण पाछे राहत अर बचाव रा कामां मांय फौज री मदद ली जा रही है।

.....

सवाईमाधोपुर मांय आज तेज बिरखा ऊं थोड़ी साता मिली, हालांकि हाल ई जिला मुख्यालय अर केई गांवां रा नीचला हलकां मांय पाणी भर्योड़ो है। जिला मुख्यालय अर केई गांवां बीचे संपर्क हाल ई बहाल नी व्हे सक्यो है। सवाईमाधोपुर अर मध्यप्रदेश ने जोड़बा वाळा गेला माथे हाल ई आवण-जावण सरू नी व्हे सकी है। और ब्यौरो म्हाणा खबरनवीस ऊं-

.....

आज चूरू, सीकर, अलवर, नागौर, अजमेर अर टोंक जिलां मांय केई ठौड़ां जोरदार मेह बरस्यो। अलवर री जिला कलेक्टर अर्तिका शुक्ला लगातार व्हे रही बारिश ने ध्यान राखता थकां जनता ऊं तेज बहाव वाळा नदी-नाळां ऊं दूर रेहवण अर सावचेती राखण री अपील कीनी है। दौसा, बीकानेर, हनुमानगढ़, कोटा, बूंदी, बारां, झालावाड़, पाली, सिरोही अर प्रतापगढ़ जिलां मांय हल्की

ऊं मझला दर्जा री बिरखा रा समाचार है। तेज बारिश री शंका ने ध्यान राखता थकां केई जिलां री स्कूलां मांय काल ई छुट्टी रो ऐलाण कर दियो ज्यो है। मौसम विभाग आज जयपुर, झुंझुनू, सीकर, बीकानेर, चुरू अर नागौर जिला मांय जोरदार बिरखा रो ऑरेंज अलर्ट जारी कीनो है। मौसम केंद्र जयपुर काल ई शेखावाटी अंचल अर बीकानेर संभाग मांय तेज बारिश रो दौर चालतो रेहवण रा आसार जताया है। थावर ऊं तेज बारिश रो दौर रुक जावण री संभावना है।

000

राज्य मांय पड़बा लायक हालत वाळा भवनां री तुरत पिछाण कर र वां ने नियम रे मुजब गिराया जावेला। स्वायत्त शासन विभाग रा शासन सचिव रवि जैन आज जयपुर मांय नगरीय निकायां रा अहलकारां ने सावचेती सागे तुरत कार्यवाही करण रा हुकम दीना। राज्य मांय व्हे रही जोरदार बिरखा ने ध्यान राखता थकां बुलायी ज्यी ई मीटिंग मांय श्री जैन जर्जर भवनां री पिछाण कर र वां ने ठंडा करण सारू चलाया जा रह्या राज्य स्तर रा अभियान री जाणकारी लीनी।

वे बतायो के अभियान रा तैत हाल ताई राज्य रा 224 नगरीय निकायां मांय पड़बा री शंका वाळा 2 हजार 699 भवनां री पिछाण करी जा चुकी है।

000

मुख्यमंत्री भजनलाल शर्मा आज जैसलमेर जिला रा रामदेवरा मांय नैत्र कुंभ समारोह रो उद्घाटन कीनो। 33 दिन ताई चालण वाळा नैत्र कुंभ मांय शिविर लगा र लोगां री आंख्यां री मुफ्त जांच करी जावेला। ई मौके मुख्यमंत्री कह्यो के राज्य सरकार आंख्यां रा बेहतर स्वास्थ्य सारू लगातार कोशिशें कर रही है। वे कह्यो के सरकार री ओर ऊं हर साल लाखों लोगां रा मोतियाबिंद रा ऑपरेशन मुफ्त कराया जा रह्या है।

.....

मुख्यमंत्री इण ऊं पैली बाबा रामदेव पैनोरमा ने निरख्यो। वे वठे पौधो ई रोप्यो। श्री शर्मा बाबा रामदेव मंदिर मांय पूजा-अर्चना कर र प्रदेश मांय सुख-साता री कामना कीनी।

000

केन्द्र सरकार कानी ऊं चलाया जा रह्या जीवन संजीवनी अभियान रा तैत 3 अगस्त ने 15वां अंगदान दिवस मणायो जावेला। जनता ने अंगदान सारू प्रेरित करण रा मकसद ऊं चलायो जा रह्यो संजीवनी अभियान जनता मांय जाग जगा रह्यो है। बारां रा जिला अस्पताल मांय जागरूकता कार्यक्रम राख्यी ज्यो अर लोगां ने अंगदान री सौगंध दिरायी ज्यी। झुंझुनू मांय लोगां ने अंगदान सारू प्रेरित करण बाबत् खास कार्यक्रम राख्या जावण सागे ई अंगदान रो संकल्प पत्र भरवायो जावेला। जिला कलेक्टर डॉ. अरुण गर्ग कह्यो के जाग जगावण रा कार्यक्रमों रे मार्फत बत्ता ऊं बत्ता लोगां ने मर्जी ऊं अंग दान करण री सीख मिले है।

.....

000

बैंकिंग संशोधन कानून-2025 काल लागू व्हे रह्यो है। इण रो मकसद बैंकिंग हलका मांय शासन मानकां मांय सुधार लावणो अर निवेशकां सारू बेहतर हिफाजत तैय करणो है। ई कानून रा प्रावधानां रो मकसद "पर्याप्त ब्याज" री सीमा 5 लाख रुपया ऊं बधा र 2 करोड़ रुपया करणो है। आ 1968 ऊं चाल रही सीमा मांय बदलाव करेला। ई कानून रे जरिये सहकारी बैंकां मांय निदेशक रो कार्यकाल आठ साल ऊं बधा र दस साल कर दियो ज्यो है।

000

रामदेवरा मेळा मांय सिरकत करण वाळा जातरूआं रा सुबीता सारू रेलवे काल ऊं मेला स्पेशल गाड़ी चलावेला। जोधपुर-रामदेवरा-जोधपुर रेलगाड़ी सात सितम्बर ताई 38 फेरा करेला। जोधपुर मंडल रा रेल प्रबंधक अनुराग त्रिपाठी बतायो के आ गाड़ी रोजीना जोधपुर ऊं तड़के चार बज्यां रवाना व्हे र संवारे पौने आठ बज्यां रामदेवरा पूगेला। आ गाड़ी रामदेवरा ऊं पाछी संवारे आठ बज र 25 मिनट परां रवाना व्हे र दोपहर बारह बज्यां जोधपुर पूगेला। दिल्ली-जैसलमेर-दिल्ली रूणीचा एक्सप्रेस काल ऊं 27 अगस्त ताई जयपुर व्हेती चलायी जावेला। फुलेरा-रींगस-रेवाड़ी रेलखंड बीचे रेल पटरियां ने दोवड़ी बणावण रा काम रे कारण ओ फैसलो करी ज्यो है।

000

राज्य मांय सरकारी नौकरियां मांय भर्ती सारू ली जावण वाळी सगळी परीक्षावां मांय शामिल व्हेवण वाळा सिख धर्म मानबा वाळा किण ई छात्र ने अब धार्मिक चिन्ह खोलबा सारू नी कह्यो जावेला।

गृह विभाग रा अतिरिक्त मुख्य सचिव भास्कर ए. सावंत ई बारां मांय हुकम जारी कीनो है। वे कह्यो के सिख उम्मीदवार कड़ा, कटार अर पगड़ी सागे परीक्षा दे सकेला। ध्यानजोग है के लारला दिनां जयपुर मांय व्ही एक प्रतियोगी परीक्षा रे दौरान पंजाब ऊं आई छात्रा ने धार्मिक प्रतीक खोलण सारू कही ज्यो हो, ज्यीं पाछे सिख संगठनां अर उम्मीदवारां री ओर ऊं नाराज़गी जताई ज्यी ही।